

## Transkription von Urkunde SAW 1388e

Ort, Datierung: Salzwedel, 1388-10-31

Signatur: Stadtarchiv Salzwedel, 46/1b

Inhalt: Rat der Stadt Salzwedel: Verkaufsbestätigung

---

Wy Dýderýk laghendorpe Claws godschalk Ghereke Brunow Hans Berteldes Bernt leppin Kersten ro/reberghe Bode vitten Wolter Hartwýghes Hans stappenbeke Dýderýk spen(n)ighe Bernt dorheyde vnde He(n)ingh / van wopelde Ratmanne der olde(n)stat to zoltwedele Bekenne(n) openbare in desseme brýue Dat wolter hart/wýghes hans hartwýghes sone vse medecumpaen vses rades heft vorcoft vnde vorlaten sin erue vn(de) hof=/ mýt aller to Behoringhe stande vnde beleggen bý deme erue dar týdeke van gartze selyger dechnisse / inne vorstarf den erlyken heren hern Bernde duuele dekene hern hinrýke mylligese kemerere vn(de) / den meýnen broderen des kalandes der prýstere mýt vs to zoltw(edele) de nú sint vnde noch to comen moghe(n) / to Besittende to ewýghen týden vor Druddehalue mark vnde twýntich brandenborghes suluers vn(de) heft / den sulue(n) heren des kalandes dat vorscreue(ne) erue vnde hof mýt aller to behoringhe vor vs mýt ener / eyndrechtlyken volbort alle vses rades olde vnde nýge vorlaten in desser wýse dat de heren des kalandes / van deme sulue(n) erue vnde houe scholen dun alle plycht vser stat also vse borghere van eren erue(n) dun / De ghank de dar buwet ýs van deme suluen houe wente vppe vser stat mûre des wýlle wý vnde vse / nacomlinghe scholen des mechtich wesen to brekende vnde to büwende . wolde wý ok dat men dar vp vn(de) / af styghen scholde so scholde wý den vpghank vnde afghank maken van Buten to bý vs(er) stat mûren / mýt ledderen eder mýt treppen also vs dat bequemest were dat de kalant an eren buwe dar vn=/becu(m)mert mede blyue Doch so scholen se nýnen ghank hebbe(n) ouer de mure vs(er) stat . To tughe vn(de) / merer bewýsinghe alle desser vorscreue(n) stucke hebbe wý vs(er) stat ingheseghel laten henghen mýt vs(er) / aller wýtschop an dessen brýf Gheue(n) na godes Bort drutteýn hundert jar in deme achte vn(de) achtý/ghýsten Jare in alle godes hýlghen auende /